

Un exposicion cu lo Sorprende Tur Hende! diaranzon awo

ORANJESTAD(AAN)— Un exposicion diferente, esey ta loke Aruba lo mira desde Diaranzon awor, dia 10 di Juni na Biblioteca Nacional. Tin diferente

hende den nos comunidad cu tin tremendo talento pa pintamento, y ta poco hende so sa di esaki. Tin biaha e personanan aki ta laga sa di nan hobby door di sali afo cu

nan obranan. Ora esaki sosode nos tur ta keda placenteramente asombra. Esaki ta netamente e caso awor cu e exposicion cu lo tuma lugar e siman aki. Ta trata aki di un exposicion di pinturana di un hoben estudiante di EPB, Sandrick Geerman y pinturana di e conocido psicologo y autor, Tony Green. Sandrick Geerman y Tony Green ta famia di otro y a dicidi pa conhuntamente presenta nan obranan na pueblo di Aruba. E obranan di Sandrick ta sumamente bunita y cos di mira. E tin un tremendo habilidad riba canvas cu ta pone su obranan luci di color, briyo y elegancia. Bale la pena mira con bunita e hoben aki ta pinta. Den e corto tempo cu e ta pintando ya el a pinta mas cu 20 obranan sin conta e tantisimo cu el a pinta pa personanan cu a haci peticionnan specifico na dje pa cierto escenario. Pa esnan cu ta amante di arte, e obranan di e hoben estudiante aki lo impresiona bo sigur. Bini pa e apertura oficial Diaranzon awo 6:30pm!

E exposicion aki ta haya un **toke unico pa motibo cu ta trata di un coleccion di dos diferente estilo di pinturana.** Tony Green, cu masha poco di nos sa cu e ta un amante di arte visual y tin un tremendo habilidad cu verf riba canvas, lo pone un parti di su grandi coleccion di pinturana riba canvas na exposicion. Un di su hobynan nos sa ta skirbimento di buki di cual ya caba e tin 9 buki na su nomber y dos actualmente den 'pipeline'. Loke nos no tabata sa ta cu e ta un tremendo pintor tambe! Green ta bay sorprende bo cu su bunita coleccion di arte den e genre di silhouette. Pinturana di e estilo aki no ta mucho comun. Ta masha poco nos ta mira pinturana di silhouette. Tony Green a expresa cu pintamento "ta un forma hopi fuerte di expresa sentimentonan, y e imaginacion di hende, y e ta un medio di comunicacion hopi efectivo."

Bale la pena mira e mahestuoso obranan di oleo y acrylico riba canvas di Tony Green!

Diaranzon atardi pa 6:30pm lo tin e apertura oficial di e bunita exposicion di Sandrick Geerman y Tony Green na Biblioteca Nacional den George Madurostraat. Tur amante di arte y esnan interesa den promove nos

cultura ta bon bini. Bin wak kico dos cabayero a haci den nan tempo liber. Bin disfruta di obranan sumamente diferente y espectacular. Si bo no conoce e genre di silhouette, esaki ta bo chens pa

wak esaki.

E exposicion lo keda habri te cu diabierna dia 19 di Juni na Biblioteca Nacional. Nos ta recomenda bo pa bishita e exposicion aki, bo lo keda hopi impresiona!